



# Pilpayu

**Documentu d'anális de la situación política xenerada pola reforma del «Estatutu del Principado» y llínies básiques d'actuación y rempuesta.**

**ANDECHA ASTUR**  
Xunetu 2008

# Desplicación y mecanismu de furrulamientu

Énte la situación aniciada cola reforma del «Estatutu de Autonomía para el Principado de Asturias» y énte la necesidá de da-y una rempuesta dende'l nacionalismu d'izquierda, Andecha Astur camienta que ye imprescindible facer un análisis lo más ampliu posible, de tala miente que puea ser compartíu pol mayor númeru de presones y muerganizaciones, y darréu d'ello avanzar nuna xunidá d'aición que permita reactivar la rempuesta popular a la situación predemocrática que carecemos n'Asturies..

Ello asina, ufiértase'l presente documentu a alderique abiertu, alvirtiendo que se trata d'un documentu voluntariamente inacabáu al oxetu de que seya más permiable a toles collaboraciones.

La dinámica de participación ye la que vien darréu:

1. Tien calter universal. Pudiendo participase a nivel presonal o colleutiu.
2. Toles participaciones tendrán que contar con una redaición alternativa o nueva (especificando separtáu y puntu) y si se quier con una desplicación del porqué de lo propuestu.
3. Facilitarásenome y direición de corréu lletrónicu o de contautu si se fae per escrito, con vistes a contautar posteriormente pa la convocatoria d'un Conceyu Abiertu que se convocará públicamente y nel que –comu'l nome indica- podrá participase con voz y votu, y nel que s'aprebaría'l testu definitivu.

Pa participar vía internet: [www.andecha.org](http://www.andecha.org)

Pa participar per escrito:

Andecha Astur  
C/ Prendes Pando 11  
33208 Xixón

# Pilpayu

**Documentu d'anális de la situación política xenerada pola reforma del «Estatutu del Principado» y llinies básiques d'actuación y repuesta.**

## A- ESTATUTU D'AUTONOMÍA

1. Dende una perspeutiva nacionaliega, un estatutu autonómicu nun pue tener más sentíu que comu pasu intermediu haza la reconocencia de la soberanía nacional. Lo que requier d'un alcuerdu previu ente les dos partes en conflictu, nel nuesu casu: L'Estáu español y Asturias.
2. Inklusu sedría posible almitir comu válidu un procesu autonómicu qu'ensin la voluntá precisa del Estáu español, sí que permita gatuñar aspeutos concretos de soberanía que refuerce la posición asturiana nesti desigual conflictu.
3. Ello asina, ye nidio que'l «Estatutu de Autonomía para el Principado de Asturias» ye un documentu inútil nel fondu (en tantu que nun supón más qu'una curtia descentralización alministrativa) y na forma (por imposición dende Madrid), col que l'Estáu español afita pasu ente pasu la so dominación sobro'l nuesu país.

## B- ÉNTE LA REFORMA DEL ESTATUTU «DEL PRINCIPADO»

1. Esta segunda reforma del «Estatutu de Autonomía para el Principado de Asturias», tien de ser analizada necesariamente dende'l fechu ciertu de que'l «Principado» y l'Estatutu d'Autonomía pa elli otorgáu nun son resultáu de la voluntá soberana del Pueblu Asturianu, sinon consecuencia única de la imposición del Estáu español, qu'a diferencia de lo qu'ocurrió n'otros pueblos, enxamás nun mos permitió pronunciamos democráticamente sobro la so aceutación o non.
2. De magar esta rialidá, el «Principado», el so «estatutu» y les sos posteriores «reformes» nun puen ser de recibu non solo pa dengún nacionaliegu, sinon pa denguna presona que se considere demócrata.

# notes

3. Por embargu, la práutica política diaria impónmos acupamos d'esta reforma estatutaria en tantu que condiciona fundamente'l futuru políticu prósimu de la nueva nación y define un marcu políticu nel que'l conxuntu de la sociedá asturiano va vese obligao a movese, ello asina Andecha Astur vese na responsabilidá de responder al mesmu.
4. Ello asina, y considerando preciso nun entamu averase a lo que fo'l procesu estatutariu que carecimos n'Asturies, considérase prioritario la conocencia del documentu «Erbíes» en tantu lu recueye y analiza.

## C - SITUACIÓN D'ANGUAÑU

1. Ye nidio que l'actual correllación de fuerces nun podemos cuntar colos mecanismos istitucionales afayaios pa defender la postura asturiana (una vuelta más hai que considerar que ye primordial la rentabilización política de los nuegos avances na sociedá), y nel mesmu sen, la nueva capacidá d'incidencia al traviés de los medios de comunicación mayoritarios ye práuticamente nula.
2. Eso supón que tenemos qu'afayar la nueva rempuesta táutica a les nuses posibilidaes oxetives, porque nun se trata namás de caltener una postura políticamente correcha nesti aspeutu del conflictu, sinon ser quien a que'l conxuntu de la sociedá asturiana seya quien a percibir tanto la existencia del conflictu comu les alternatives qu'ufierta'l nacionalismu asturianu.
3. Nesi sen, plantegámosmos dos niveles d'actuación, ún a nivel estratéxicu que ye inamovible: la única validez de la fórmula estatutaria comu pasu intermediu haza la reconocencia de la soberanía nacional asturiana y otru a nivel táuticu qu'entendemos tien d'encontianses grandes contradiciones nes qu'entra l'Estáu español y les sos partíos títeres nel nuesu país al defender esti estatutu impuestu, afondando nel fechu ciertu y socialmente conocíu de que non solo nun reconoz el mesmu techu competencial qu'a otres comunidaes (lo que yá ta escomenzando a presentase comu daqué «normal») sinon y sobro too nel agraviu comparativu que supón qu'a los asturianos –a diferencia qu'a vascos, andaluces, gallegos, catalanes...- ensiquiera se mos permita votar nin la istitución –el «Principado»- nin l'Estatutu.
4. Esti aspeutu discriminatoriu fundamente sentíu pol conxuntu de la sociedá asturiano que lo percibe comu un fechu ciertu, pero dificilmente despllicable, tien de

servimos p'afondar na so espresión política, complementando esa percepción con la desplicación evidente de qu'ello obedez a unos planteamientos colonialistes y d'asimilación nacional por parte del Estáu español, nel que la non reconocencia de la oficialidá del asturianu, la segregación llingüística social y económica del occidente asturianu, la emigración forciada de miles de mozos tolos años, la precariedá llaboral, l'esfarrapamientu industrial, la estroza mendioambiental... nun son elementos independientes que puean ser analizaos individualmente, sinón consecuencia de l'aplicación del proyeutu políticu del Estáu español pa con Asturias a la gueta del so esaniciumu comu pueblu.

# notes

## D - ASPEUTOS TÁUTICOS

1. Ello asina, ún de los mayores erros nos que podemos cayer ye'l considerar los aspectos concretos del actual estatutu y de les pretendíes reformes al mesmu que previsiblemente van aprebise. Entrar nesí alderique falsu namás supón da-y validez al mencionáu estatutu y al paripé de reforma estatutaria na qu'agora s'afayen.
2. Entrar a falar de financiación autonómica, la forma d'eleición de presidente o de convocatoria d'Eleiciones autonómiques... supón entrar nel xuegu marcáu dende Madrid y lleváu alantre polos partíos títeres n' Asturias, dando-y valir a una farsa ensin dengún sentíu nin oxetu.
3. La cuestión principal, al rodiu la que tenemos qu'arreyar fuerces y sensibilidaes, y per ende, la única que tien de ser planteada ye que se trata d'un estatutu y una institución impuestos, y qu'eso supón una situación antidemocrática y un agraviumu comparativu respeutu a otres comunidaes del Estáu español a les que sí se-yos permitió exercer tal drechu.
4. Comu mensaxe secundariu, y complementariu al principal, hai que desplicar que les causes de que nun permiten opinar al Pueblu Asturianu son senciellemente por que son conscientes d'afechu de qu'esti enxamás nun almitiría un Estatutu autonómicu que polo menos nun supunxera un tratu discriminatoriu pa col restu de «comunidaes» del Estáu, y poque permitir al Pueblu Asturianu opinar respeutu al marcu políticu nel que quier desendolcase supondría sacar a la lluz el braeru alderique de fondu: la soberanía nacional asturiana.

# notes

## E - LLINGUA ASTURIANA

1. La Oficialidá de la llingua asturiana, foi presentada y ye sentía polos más de la sociedá asturiana comu aspeutu fundamental a algamar nesta nuea reforma estatutaria, por embargu, lo cierto ye qu'esta custión **ta siendo emplegada comu un mecanismu pa solapar el problema de fondu** –l'ausencia de llibertaes y drechos democráticos n'Asturies y la imposición del Estatutu y del «Principado»- **propiciándose un alderique y unes movilizaciones ermos, a sabiendes de qu'esta vía ye cenciellamente inútil.**
2. Ello asina ye imprescindible dexar perañitao:
  - a. Que **ye imposible algamar la oficialidá na actual reforma** estatutaria, darréu que tantu'l PSOE comu'l PP ñéguense a almitir principios democráticos pa la sociedá asturiana.
  - b. Que **nun se trata d'un conflictu puramente llingüísticu**, sinon inegablemente políticu, qu'hai qu'analizar nel contestu enantes desplacáu y que toles iniciatives de despolitizalu beneficien dafechu la posición españolista.
  - c. Que **nun ye éticu l'embayar a la xente plantegándose la oficialidá comu oxetivu próximu** y qu'ello nun acarreta más que la desmovilización a mediu plazu.
  - d. Qu'agora mesmo los únicos movimientos válidos son aquellos que:
    - i. Pongan n'evidencia la situación pre-democrática na que mos afayamos.
    - ii. Tean un costu socio-políticu pa les presones y formaciones sociales, polítiques y económiques qu'afiten esta situación.
    - iii. Abran vías nueves d'actuación pa que se reconozan los drechos llingüísticos del Pueblu Asturianu.
3. Per otru llau, y de forma absoluta consideramos d'una falta dafechu d'ética que se remane la demanda de la oficialidá de la llingua asturiana pa sofitar la oficialidá de lo que'l PSOE inventó hai 15 años -el «gallego-asturiano»- afirmando qu'esti despropósiu namás beneficia a los intereses desintegraores de la nación asturiana y considerando a cualaquier presona y/o muerganización qu'a ello collabore comu contraria a los llexítimos drechos ya intereses del Pueblu Asturianu y collaboracionista colos más baxos comportamientos españoles.
4. Nesi sen, la redaición agora propuesta pal artículu 4º



# notes

## F - PROPUESTES CONCRETES

1. Afitar comu criterios de la campaña la denuncia de la imposición de la Istitución del «Principado» y del «Estatutu de Autonomía», asina comu les reformes feches al mesmu, ciontrándonos nel agraviu comparativu que supón qu'a los asturianos a diferencia d'otros pueblos nun se mos tea permitío votalu, cola referencia de la falta de democracia que se vive n'Asturies.
2. Complementar esi discursu primariu col discursu estratéxicu principal: La falta de Democracia n'Asturies.
3. Considerar que l'anterior análisis y posible campaña nun tien de ser padrimonial d'Andecha Astur, sinon que ye mui asumible socialmente, inclusu por presones y/o mueganizaciones que nun ten necesariamente nidia la custión nacional. Ello asina:
  - i. Contautarése con otres formaciones socio-polítiques al oxetu de da-yos a conocer la nuesa postura y campaña
  - ii. Facilitarése l'alderique en Conceyu Abiertu del presente análisis y propuestes, nun entamu al traviés d'internet, y llueu de forma presencial.
  - iii. Collaborarése en toa iniciativa que coincida colos oxetivos equí espuestos independientemente de los convocantes.
  - iv. Abriránse vías de colaboración p'aquelles presones y formaciones que compartan l'anális equí desendolcáu y quieran participar na necesaria repuesta a la situación esistente.
  - v. Intentarése nun patrimonializar comu Andecha les iniciatives y movilizaciones, de tala miente que'l restu les formaciones perciban que lo qu'importa son los conteníos y non la rentabilización socio-política de la campaña-
4. Centrar la nuesa actuación a nivel de cai, y de conceyu, considerando les Cases-Conceyu comu la Istitución más próxima a les nuses posibilidaes d'actuación político.
5. Ensin perxuiciu de lo enantes reseñao, Andecha Astur dirá entamando les actuaciones sociales que camiente afayaices siempre na llinia de la colaboración y converxencia con otres formaciones, a la gueta d'ameyorar la capacidá d'incidencia social nel necesariu avance haza la normalización democrática n'Asturies.



Lorenzo Abruñedo 8 Baxu. 33012 Uviéu · Tfnu 985 11 07 14  
Prendes Pando 11 Baxu. 33207 Xixón · Tfnu 985 39 94 44  
e-mail: [info@andecha.org](mailto:info@andecha.org)  
[www.andecha.org](http://www.andecha.org)